

Direkcija za civilno zrakoplovstvo Bosne i Hercegovine

Tumačenje člana 14. stav (3) tačke d) i e) u vezi sa članom 83. stav (1) Zakona o zrakoplovstvu Bosne i Hercegovine ("Službeni glasnik BiH", broj: 39/09)

Datum izdavanja: 01.05.2013.

Mjesto izdavanja: Banja Luka

Obrazloženje za izdatu Operativnu naredbu

1. Odredbe člana 14. stav (3) tačka d) i e) Zakona o zrakoplovstvu Bosne i Hercegovine (u daljem tekstu: Zakon) glase:

"BHDCA će, radi olakšanja i ubrzanja regulatornog procesa i s ciljem obezbjeđenja europske standardizacije, kao referencu, u svoje propise uvrstiti sljedeće propise:

- d) zajedničke propise za zrakoplovstvo (JAR), osim ako su obuhvaćeni ECAA multilateralnim sporazumom,
- e) propise Međunarodne organizacije za civilno zrakoplovstvo (u daljnjem tekstu: ICAO)".

2. Odredba člana 83. stav (1) Zakona glasi:

"BHDCA može stranu dozvolu učiniti važećom da bi imalac dozvole vršio ovlaštenja na zrakoplovu registriranom u BiH, ako je ta strana dozvola izdata pod uslovima koji nisu manje zahtjevni od onih koji se primjenjuju na BHDCA dozvole. Validacija će biti potvrđena Potvrdom o validaciji. Potvrda o validaciji važiće samo zajedno sa stranom dozvolom na kojoj je zasnovana i samo onoliko dugo koliko bude važila ta strana dozvola, odnosno ovlaštenje upisano u dozvolu."

Pravilnikom o uslovima i načinu sticanja, izdavanja, obnavljanja i produžavanja dozvola i ovlaštenja zrakoplovnom osoblju-pilotima aviona* ("Službeni glasnik BiH", broj: 51/04 od 16.11.2004), Pravilnikom o uslovima i načinu sticanja, izdavanja, obnavljanja i produžavanja dozvola, ovlaštenja i autorizacija zrakoplovnom osoblju-pilotima helikoptera* ("Službeni glasnik BiH", broj: 95/08 od 01.12.2008) i Pravilnikom o uslovima i načinu utvrđivanja zdravstvene sposobnosti zrakoplovnog osoblja i uslovima koje mora da ispunjava zdravstvena ustanova i ovlašteni ljekar za obavljanje ljekarskih pregleda zrakoplovnog osoblja ("Službeni glasnik BiH", broj: 56/10 od 12.07.2010), BHDCA je izvršila transpoziciju i punu primjenu odredbi zajedničkih zrakoplovnih zahtjeva propisanih za pilote aviona (JAR-FCL 1), pilote helikoptera (JAR-FCL 2) i utvrđivanje ljekarske sposobnosti letačkom osoblju (JAR-FCL 3).

Izvršenom analizom odredbi člana 14. stav (3) tačka d) i e) u vezi sa članom 83. stav (1) Zakona i zahtjeva iz gore navedenih pravilnika po pitanju provođenja postupka validacije letačke dozvole, izdate od strane zrakoplovne uprave zemlje punopravne članice JAA, a na osnovu nalaza EASA Tima za standardizaciju u oblasti licenci letačkog osoblja (nalaz BA#14853), BHDCA daje sljedeće tumačenje odredbe člana 14. stav (3) tačke d) i e), u vezi sa članom 83. stav (1) Zakona:

- 1) Prihvatanje JAA dozvola i prava letenja na zrakoplovu koji je registriran u BiH, kako je definisano zahtjevom JAR-FCL 1.015/2.015 (a), BHDCA u potpunosti prihvata dozvolu letačkog osoblja izdatu od strane države punopravne članice JAA (prema zahtjevima JAR-FCL 1, odnosno JAR-FCL 2, navedenim u listi uzajamnog prihvatanja dozvola, objavljenoj na internet stranici EASA-e: <http://www.easa.europa.eu/approvals-and-standardisation/mutual-recognition.php>) za letenje na zrakoplovu registriranom u Bosni i Hercegovini, bez dodatnih formalnih zahtjeva u pogledu statusa dozvole i ovlaštenja.

Pravilnom primjenom člana 14. stav (1) tačka d) Zakona isključuju se primjena člana 83. stav 1. Zakona.

- 2) Za svo ostalo letačko osoblje koje posjeduje letačku dozvolu izdatu saglasno ICAO Aneksu 1, BHDCA će u potpunosti primijeniti odredbu o validaciji strane letačke dozvole, saglasno zahtjevima i procedurama definiranim u JAR-FCL 1.015/2.015 (b), izdajući im Potvrdu o validaciji strane dozvole saglasno zahtjevu člana 14. stav (1) tačka e) u vezi sa članom 83. stav (1) Zakona o zrakoplovstvu Bosne i Hercegovine.

Na osnovu gore navedenog a saglasno zahtjevima JAR-FCL 1.065/2.065 (e), punom primjenom navedenih zahtjeva za licenciranje letačkog osoblja, BHDCA nije u mogućnosti izdati BHDCA JAR dozvolu licu koje posjeduje JAR dozvolu izdatu od strane države punopravne članice JAA.

Razlog izdavanja Operativne naredbe

Na osnovu nalaza EASA, broj: BA#14853, konstatovano je odstupanje od pune primjene zahtjeva JAR-FCL u oblasti letačkih licenci u domenu zahtjeva JAR-FCL 1.015 /2.015 (a) koji definira postupak prihvatanja izdatih dozvola, ovlaštenja, posebnih ovlaštenja, odobrenja ili potvrda izdatih od strane zrakoplovnih vlasti države članice JAA, u skladu sa uslovima JAR-FCL i pratećih procedura, bez formalnosti od strane drugih država članica JAA.

Kako je Bosna i Hercegovina u potpunosti primijenila date zahtjeve JAR-FCL, navedenim tumačenjem člana 14. stav (3) tačke d) i e) u vezi sa članom 83. stav (1) Zakona obezbjeđuje poštovanje zahtjeva, kao i otklanjanje i zatvaranje predmetnog nalaza.

Potpis generalnog direktora:

